



Broj: 01-50-1-177-16/25

Sarajevo, 23. 1. 2025.

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 21-01-2025			
Organizaciona jedinica	Klasifikaciona oznaka	Redni broj	Broj priloga

## ZAPISNIK

16. hitne sjednice Predstavničkog doma  
Parlamentarne skupštine Bosne i Hercegovine,  
održane 23. 1. 2025.

Sjednica je počela u 16.42 sati. Prisustvovalo je 40 poslanika.

Odsustvovali su Vlatko Glavaš i Zlatan Begić.

Sjednici su prisustvovali: delegat u Domu naroda Parlamentarne skupštine BiH Želimir Nešković, ministrica civilnih poslova BiH Dubravka Bošnjak, zamjenik ministra pravde BiH Elvir Mahmuzić i zamjenica ministra za ljudska prava i izbjeglice BiH Duška Jurišić.

Sjednicu su pratili predstavnici: Ministarstva pravde BiH, Ministarstva finansija i trezora BiH, Institucije ombudsmena za ljudska prava BiH i Agencije za zaštitu ličnih podataka u BiH.

Iz međunarodnih organizacija sjednicu su pratili predstavnici OSCE-a, Delegacije EU u BiH, te predstavnici ambasada Republike Hrvatske, Velike Britanije, Švedske i SAD-a.

\*\*\*\*\*

Predsjedavajući je rekao da je 16. hitna sjednica Predstavničkog doma sazvana u skladu s članom 27. stav (1) tačka b) i članom 68. Poslovnika Predstavničkog doma Parlamentarne skupštine Bosne i Hercegovine.

Predsjedavajući je konstatirao da 16. hitna sjednica Predstavničkog doma ima sljedeći

## DNEVNI RED

1. Prijedlog zakona o zaštiti ličnih podataka, P.Z.E.I, predlagač: Vijeće ministara BiH, broj: 01,02-02-1-2548/24 od 17. 12. i 18. 12. 2024, skraćeni postupak (drugo čitanje).

\*\*\*\*\*

**Ad. 1. Prijedlog zakona o zaštiti ličnih podataka, P.Z.E.I, predlagač: Vijeće ministara BiH, broj: 01,02-02-1-2548/24 od 17. 12. i 18. 12. 2024, skraćeni postupak (drugo čitanje)**

Predsjedavajući je dao uvodne napomene.

U raspravi o Prijedlogu zakona učestvovali su: Sanja Vulić, Milorad Kojić, Predrag Kojović, Saša Magazinović, Sabina Ćudić, Mia Karamehić-Abazović, Darko Babalj, Branislav Borenović, Šerif Špago, Midhat Čaušević, Jasmin Imamović i Mladen Bosić.

Predstavnički dom je, s 23 glasa „za“ (iz Federacije BiH 18, iz Republike Srpske pet), sedam „protiv“ i deset „suzdržanih“ glasova, usvojio Prijedlog zakona o zaštiti ličnih podataka, P.Z.E.I, u drugom čitanju, s amandmanima iz Izvještaja Ustavnopravne komisije, koji glase:

**Amandman I.**

U članu 8. (Zakonitost obrade ličnog podatka) stav (2) mijenja se i glasi:

„(2) Pravni osnov za obradu ličnog podatka iz stava (1) tač. c) i e) ovog člana utvrđuje se zakonima institucija BiH, entiteta i kantona, u skladu s nadležnostima, tako da se preciznije propišu posebni uslovi za obradu te druge mjere za osiguravanje zakonite i pravične obrade, između ostalog i za druge posebne obrade, kako je to predviđeno u Poglavlju V. ovog zakona.“

U članu 8. (Zakonitost obrade ličnog podatka) u stavu (3) iza riječi: „Posebnim zakonima za obradu podatka iz stava (1) tač. c) i e) ovog člana“ dodaju se riječi: „institucija BiH, entiteta i kantona, u skladu s nadležnostima,“.

**Amandman II.**

U članu 33. (Saradnja s Agencijom) ispred riječi „zahtjev“ dodaju se riječi: „obrazložen i na osnovu zakona opravdan“.

**Amandman III.**

U članu 53. stav (2) riječi: „Odredbe ovog zakona uzimaju se u obzir“ zamjenjuju se riječima: „Ovaj zakon primjenjuje se“.

**Amandman IV.**

Naziv dijela Zakona: „DIO TREĆI – OBRADA LIČNOG PODATKA OD NADLEŽNOG ORGANA KAO KONTROLORA PODATAKA“ mijenja se i glasi:

„DIO TREĆI – OBRADA LIČNOG PODATKA OD NADLEŽNOG ORGANA KAO KONTROLORA PODATAKA U SVRHU SPREČAVANJA, ISTRAGE I OTKRIVANJA KRIVIČNIH DJELA ILI GONJENJA POČINILACA KRIVIČNIH DJELA, IZVRŠAVANJE KRIVIČNIH SANKCIJA, UKLJUČUJUĆI ZAŠTITU OD PRIJETNJI JAVNOJ SIGURNOSTI I NJHOVO SPREČAVANJE“.

#### **Amandman V.**

U Prijedlogu zakona o zaštiti ličnih podataka Bosne i Hercegovine poslije člana 57. predlažem dopunu novim članovima 57a. i 57b. koji glase:

##### **„Član 57a.**

(Obrada biometrijskih podataka u svrhu sigurne identifikacije)

(1) Obrada biometrijskih podataka može se provoditi samo ako je propisana zakonom ili ako je nužna za zaštitu lica, imovine, klasificiranih podataka, poslovnih tajni ili za pojedinačnu i sigurnu identifikaciju korisnika usluga, uzimajući u obzir da ne prevladavaju interesi nosioca podataka koji su u suprotnosti s obradom biometrijskih podataka iz ovog člana.

(2) Pravni osnov za obradu biometrijskih podataka nosioca podataka radi sigurne identifikacije korisnika usluga izričita je saglasnost takvog nosioca podataka data u skladu s odredbama ovog zakona.“

#### **Amandman VI.**

##### **„57b.**

(Obrada biometrijskih podataka u službenim prostorijama)

Dopuštena je obrada biometrijskih podataka zaposlenika u svrhu evidentiranja radnog vremena i radi ulaska i izlaska iz službenih prostorija, ako je propisano zakonom ili ako se takva obrada provodi kao alternativa drugom rješenju za evidentiranje radnog vremena ili ulaska i izlaska iz službenih prostorija, uz uslov da je zaposlenik dao izričitu saglasnost za takvu obradu biometrijskih podataka u skladu s odredbama ovog zakona.“

#### **Amandman VII.**

U članu 70. stav (1) tačka f), članu 71. stav (4), članu 73. stav (1), članu 102. stav (1) tačka f) i članu 107, kao i svim odredbama predmetnog zakona u kojima se propisuje „pravo na podnošenje pritužbe Agenciji“ treba zamijeniti „pravom na podnošenje prigovora“

#### **Amandman VIII.**

U članu 82. (Saradnja nadležnog organa i obrađivača s Agencijom) ispred riječi „zahtjev“ dodaju se riječi: „obrazložen i na osnovu zakona opravdan“.

#### **Amandman IX.**

U članu 97. (Nezavisnost Agencije) stav (6) mijenja se i glasi:

„(6) Pravilnik o unutrašnjoj organizaciji Agencije, na prijedlog direktora Agencije, odobrava Parlamentarna skupština Bosne i Hercegovine.“

Stav (7) ovog člana mijenja se i glasi:

„(7) Agencija, u skladu s odredbama Zakona o finansiranju institucija Bosne i Hercegovine, priprema nacrt godišnjeg budžeta i dostavlja ga parlamentarnoj komisiji na odobravanje. Agencija, nakon dobivanja odobrenja parlamentarne komisije, u skladu s rokovima propisanim odredbama Zakona o finansiranju institucija Bosne i Hercegovine, dostavlja Ministarstvu finansija i trezora Bosne i Hercegovine nacrt budžeta radi uvrštavanja u budžet institucija Bosne i Hercegovine i međunarodnih obaveza Bosne i Hercegovine. Ministarstvo finansija i trezora Bosne i Hercegovine, Vijeće ministara Bosne i Hercegovine i Predsjedništvo Bosne i Hercegovine mogu dati mišljenje o nacrtu budžeta Agencije, bez mogućnosti izmjene nacrta budžeta koji je prethodno odobrila parlamentarna komisija.“

#### **Amandman X.**

U članu 99. (Uslovi za imenovanje, privremena suspenzija i razrješenje direktora i zamjenika direktora) u stavu (3) tačka b) mijenja se i glasi:

„b) da je državljanin Bosne i Hercegovine (svi državljani Federacije BiH, Republike Srpske i Brčko Distrikta su državljani BiH)“.

#### **Amandman XI.**

U članu 99. stav (5) iza tačke b) dodati novu tačku c) koja glasi:

„c) kada navrši 65 godina života i najmanje 20 godina staža osiguranja ili 40 godina staža osiguranja, nezavisno od godina života“.

Dosadašnja tačka c) postaje tačka d).

#### **Amandman XII.**

U članu 108. (Prava na pritužbu Agenciji) u stavu (1) riječ „vansudska“ zamjenjuje se riječju „sudska“.

#### **Amandman XIII.**

U članu 110. (Pravo na djelotvorno pravno sredstvo protiv kontrolora podataka ili obrađivača) stav (1) mijenja se i glasi:

„(1) Nosilac podataka ima pravo na sudsku zaštitu protiv kontrolora podataka ili obrađivača ako smatra da su zbog obrade ličnih podataka prekršena njegova prava iz ovog zakona, ne dovodeći u pitanje druga upravna ili vansudska pravna sredstva, uključujući pravo na podnošenje pritužbe Agenciji iz člana 108. stav (1) ovog zakona.“

#### **Amandman XIV.**

U članu 113. (Opći uslovi za izricanje novčane kazne) u stavu (4) između oznake valute „KM“ i riječi „kaznjava“ dodaje se tekst: „ili u slučaju preduzetnika do 2% ukupnog godišnjeg prometa na svjetskom nivou za prethodnu finansijsku godinu, zavisno od toga koji je iznos viši“.

U stavu (5) ovog člana između oznake valute „KM“ i riječi „kazniti“ dodaje se tekst: „ili u slučaju preduzetnika do 4% ukupnog godišnjeg prometa na svjetskom nivou za prethodnu finansijsku godinu, zavisno od toga koji je iznos viši“.

U stavu (6) na kraju teksta interpunkcijski znak tačka zamjenjuje se interpunkcijskim znakom zarez i dodaje se tekst: „ili u slučaju preduzetnika do 4% ukupnog godišnjeg prometa na svjetskom nivou za prethodnu finansijsku godinu, zavisno od toga koji je iznos viši“.

Sjednica je završena u 18.11 sati.

Sastavni dio Zapisnika je transkript 16. hitne sjednice Predstavničkog doma.

SEKRETAR  
PREDSTAVNIČKOG DOMA  
**Dražen Mustapić**

PREDSJEDAVAJUĆI  
PREDSTAVNIČKOG DOMA  
**Dr. Denis Zvizdić**